

**Grad Novi Pazar
Skupština grada
Odbornička grupa SDA Sandžaka
Novi Pazar
14. novembar 2021. godine**

**P R E D S J E D N I K U
SKUPŠTINE GRADA NOVOG PAZARA**

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ZAKLJUČKA O KRŠENJU LJUDSKIH PRAVA BOŠNJAKA OD STRANE POLICIJE I PRAVOSUDNIH ORGANA U NOVOM PAZARU**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 15. novembra 2021. godine.

**Predsjednik odborničke grupe
Ahmedin Škrijelj**

PRIJEDLOG

Na osnovu člana 32. stav 1. tačka 10) i 20) a u vezi sa članom 79. stav 1. tačka 2. Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 147. Statuta grada Novog Pazara („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 15. novembra 2021. godine, donosi

ZAKLJUČAK

o kršenju ljudskih prava Bošnjaka od strane policije i pravosudnih organa u Novom Pazaru

I

Skupština grada Novog Pazara konstatuje da policija i pravosudni organi u Novom Pazaru krše ljudska i manjinska prava Bošnjaka garantovana Ustavom i zakonima.

II

Skupština grada Novog Pazara osuđuje neosnovano saslušavanje profesora razredne nastave Adele Melajac te prijetnje i pritiske kojima su, od strane policijskih službenika i tužilaštva, izloženi građani Novog Pazara bošnjačke nacionalnosti Sulejman Gorčević i Muhedin Murtezić. Skupština grada takođe osuđuje posljednji slučaj policijske brutalnosti kada je pretučenom Mirzi Muriću usled policijske torture odstranjena slezena.

III

Skupština grada Novog Pazara smatra da ovakve i slične aktivnosti policije, tužilaštva i drugih državnih organa kao posledicu mogu imati povećanje stepena nepovjerenja Bošnjaka u državne organe i narušavanje međunacionalnih odnosa u Novom Pazaru.

IV

Skupština grada Novog Pazara zahtjeva da policijski službenici i drugi državni službenici koji učestvuju u prijetnjama i pritiscima kojima su izloženi građani Novog Pazara bošnjačke nacionalnosti ili vrše torturu budu adekvatno sankcionisani i procesuirani.

V

Skupština grada Novog Pazara poziva sve državne organe da shodno članu 14. i 18. Ustava Republike Srbije bezuslovno štite prava i osiguraju posebnu zaštitu Bošnjacima u Novom Pazaru radi ostvarivanja potpune ravnopravnosti, očuvanja njihovog identiteta i dostojanstva ličnosti.

VI

Ovaj zaključak dostaviti Ministarstvu unutrašnjih poslova i Ministarstvu pravde Republike Srbije.

VII

Ovaj zaključak objaviti u "Službenom listu grada Novog Pazara"

SKUPŠTINA GRADA NOVOG PAZARA

Broj:

U Novom Pazaru, _____. _____. 2021. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Pravni osnov za donošenje ove odluke je sadržan je u:

- članu 32. stav 1, tačka 10) i 20) Zakona o lokalnoj samoupravi;
- članu 79. stav 1. tačka 2) Zakona o lokalnoj samoupravi;
- članu 147. Statuta grada Novog Pazara
- članu 137. Poslovnika Skupštine grada Novog Pazara

Razlozi za donošenje odluke:

Razlozi za donošenje ovog zaključka temelje se na sve izraženijoj uznemirenosti građana Novog Pazara bošnjačke nacionalnosti i nepovjerenju u policiju i tužilaštvo zbog njihovog odnosa prema Bošnjacima.

Saslušavanje ugledne profesorice razredne nastave Adele Melajac, bez saopštavanja po čijem nalogu i u vezi kog krivičnog djela, izazvalo je zabrinutost kod Bošnjaka da mogu trpjeti posledice ukoliko žele ostvarivati svoja Ustavom i zakonom garantovana prava.

Pored navedenog slučaja, odborničkom klubu SDA Sandžaka obratili su se Sulejman Gorčević i Muhedin Murtezić sa žalbom da su izloženi prijetnjama, zastrašivanju i pritiscima od policijskih službenika, kao i da tužilaštvo i policija ne preduzimaju radnje, na koje ih zakon obavezuje, a kako bi pomenutim licima obezbijedili sigurnost.

Sulejman Gorčević, tvrdi da trpi konstantne prijetnje i zastrašivanja, na nacionalnoj osnovi, od strane policijskog službenika Aleksandra Mijailovića. Gorčević tvrdi da posjeduje snimke sa nadzorne kamere kako pomenuti policajac čak i sa oružjem u rukama prijeti porodici Gorčević.

Sulejman Gorčević navodi da je na njegovu porodičnu kuću jednom bačena i neka vrsta topovskog udara (ili čak možda neka eksplozivna naprava) kada mu je načinjena i materijalna šteta (za šta takođe, postoji video snimak).

Gorčević tvrdi da je u više navrata nadležne u policiji upoznao sa problemima koje ima, a koji traju skoro sedam godina, međutim policija i tužilaštvo nisu ništa preduzeli kako bi zaštitili njega i njegovu porodicu i preduzeli odgovarajuće mjere protiv policajca koji ugoržava sigurnost porodice Gorčević niti su otkrili ko je odgovoran za bacanje naprave na porodiču kuću Gorčevića.

Odborničkom klubu SDA Sandžaka, takođe se obratio i Muhedin Murtezić sa sličnim problemom koji se odnosi na postupanje policije i tužilaštva.

Naime, prema tvrdnjama Murtezića, u određenom je sporenju sa svojim komšijom koje traje oko četiri godine.

Murtezić ističe da ga komšija bez osnova konstantno prijavljuje policiji, te da mu je policija više puta vršila pretres prostorija u kojima stanuje i privodila ga u policiju ali da nikada nisu našli ništa od nedozvoljenih predmeta ni radnji na osnovu kojih bi mogli da pokrenu krivični ili prekršajni postupak protiv njega.

Murtezić ističe da je policija često bahata i gruba te da prema njemu i članovima njegove porodice postupa nekorektno.

Murtezić naglašava da ga komšija neovlašćeno snima, te da mu je 14.03.2020. godine nanio teške telesne povrede ali da nijedan od nadležnih organa nije ništa uradio, po službenoj dužnosti, niti je pokrenut bilo kakav postupak protiv lica koje je Murteziću nanijelo povrede i na drugi način ga uznemiravao kao i članove njegove porodice.

Murtezić tvrdi da zbog rodbinskih odnosa komšije, sa kojim Murtezić ima probleme, i određenih policijskih inspektora i službenika doživljava konstantne pritiske i maltretiranja od policije.

Muhedin Murtezić pocrtava da iako je protiv komšije podnijete prijava za lažno prijavljivanje policija konstantno dolazi i vrši pritisak na njega i uznemirava mu porodicu. Murtezić je više puta razgovarao sa pojedinim rukovodiocima u policiji ali bez uspjeha.

Slučaj brutalnog premlaćivanja Mirze Murtezića od strane policije prilikom njegovog hapšenja, kada je isti usled teških povreda zadobijenih tom prilikom operisan na hiruškom odeljenju novopazarske Opšte bolnice, gdje su mu doktori izvadili slezenu, takođe predstavlja jedan od primjera kršenja ljudskih prava građanima bošnjačke nacionalnosti.

Imajući u vidu sve naprijed navedeno, neophodno je da Skupština grada usvajanjem ovog zaključka državnim organima i javnosti ukaže na neodrživost postojećeg stanja te da istakne da je velikosrpski nacionalizam kao jedna od najtežih pošasti 20 vijeka i dokazani neprijatelj bošnjačkog naroda prisutan i u državnim službama i institucijama.

Finansijska sredstva za sprovođenje ovog akta nisu potrebna.